

नेपाल भाषाया पेपु चचा म्ये

१. श्री आर्यवलोकितेश्वर (करुणामय)
२. अन्नपूर्ण देवी (असंभलु अजिमा)
३. वज्रपाणि बोधिसत्व
४. आर्यतारा देवी

Four Buddhist Ritual Songs
in Nepal Bhasa

1. Aryavalokitesvara
2. Annapurna Devi
3. Vajrapani Bodhisattva
4. Arya Tara Devi



श्री आर्यवलोकितेश्वर (करुणामय)

राग - नत

ताल - जति

द्वाफो स्वांया उन छपाख्वाम निगः मिखा ।

नवरत्न जरेयाना तःगु मकुटं पुया बिज्याःम्ह ॥

नमस्कार नमस्कार श्री करुणामययात ।

लोक उधार याना दुःख फूका बिज्याम्ह ॥ धु ॥

मकुटस अमिताम्भ तथागत बिज्याका ।

न्यातां उनया वसतं पुना जँस बांलाक हिना ।

जवल्हातं अभयवर बिया बिज्याम्ह ।

देपाल्हातं उफो स्वां ज्वना बिज्याम्ह ॥

जगत यात तरेयाना अभय ब्यूम्ह ।

अवीची नर्कय् च्वनाच्चपिन्त उधार याम्ह ॥

थ्व चचा चिउम्ह कुलिश रत्न धाःम्ह ।

मन्त्रसिद्धि विहारय् सवल बहा याम्ह ॥



अन्नपूर्ण देवी (असंभलु अजिमा)

राग - गुञ्जलि

ताल - जति

सर्प आसनयाना तुयूगु वर्ण स्वंग्व मिखाकना ।
मकुटस मणि रत्न जरेयाना तःगुलि शोभाम्ह ॥

संसार या प्राणिपिन्त उधार याना बिज्याम्ह ।
छपाः ख्वाः च्याकाल्हा दया ग्यानापुगु रुपम्ह ॥

जवपाखे पेहाल्हातं ज्वसा ज्वना बिज्याम्ह ।
पात्र खडग वज्र, अक्षय सूभ माला ॥

देपा पाखे विन्दु ढाल गं कलश ज्वना बिज्याम्ह ।
दुष्ट जन यात फूका ऋद्धि सिद्धि बीम्ह ॥

चक्रि कुन्डल कण्ठ रोचक भेखरां तियाच्चम्ह ।
योगीनी पुचलय् च्वना हर्ष यानाच्चम्ह ॥

अन्नपूर्णा माता सकसितं उधार याम्ह ।
ज्ञानेश्वरिया चरणे जन्म जन्म शरणं ।

मन्त्रसिद्धि महाविहारया कुलिस रत्न धाम्ह ।
मांया पालिकास थ्व चचा चिना हाम्ह ॥



बज्रपाणि बोधिसत्व

राग - कामोड

ताल - खटंकार

वचूवर्ण निकाल्हाम्ह धँवा पिकया ग्यानापूम्ह ।
व्वयाच्चंगु सँ जुया उलमन्त भेष कया ॥

बुद्ध सासन रक्षा यायेत प्यंगु युगय् सनं ।
छपिन्त बन्दना दु हे गुह्य बज्रपाणि ॥

स्वगः मिखा कनाव प्यम्हमार स्यानाव ।
जव ल्हातिं बज्र ज्वना देपा ल्हातं गं थाना ॥

थिथी रत्नया तिसा व नागाभरणं तियाव ।
जःसँ धुँया छेंगुलिं हितुमतु हिनाव ॥

छवयाच्चंगु मि थें छपिं, भारदक्क ख्याइम्ह ।
यक्व बल दुम्ह छपि सत्रु नास याइम्ह ॥

सत्त्वप्राणि उधार यायेत उत्पति जूवम्ह ।
दुःख दक्क फूकेत बिज्याम्ह महाबिर ॥

जन्म जन्म काछिं, सवगुरु चरणय् ।
बज्रपाणि बोधिसत्वया शरणय् वंम्ह ॥

थ्व चचा च्यूम्ह कुलिश रत्न धाःम्ह ।
मन्त्रसिद्धि महाविहारय् उत्पन्न जूम्ह ॥



आर्यतारा देवी

राग - गन्धाभैरवी

ताल - भूप

वाउँगु वर्णम्ह ललितासन याना बिज्याम्ह छःपा ख्वाम्ह ।
निग्वः मिखा पलेहम्ह मकुटसं मणिरत्न दया स्वभाम्ह ॥

नमस्कार नमस्कार श्री आर्यतारायात ॥ धु ॥
जवल्हातं अभय बिया देपाः ल्हातं उफोस्वां ज्वना ॥

अकालं सीगुभय फूका स्वंगु भूवने बिज्याम्ह ।
नमस्कार नमस्कार श्री आर्यतारायात ॥ धु ॥

न्याता उनया वसतं पुना बिज्याम्ह श्री आर्यतारा ।
बुद्धया ज्ञान भक्तजनयात कना उधार याना ॥

नमस्कार नमस्कार श्री आर्यतारायात ।
थ्व चचा च्यूम्ह आर्यताराया शरणे वंम्ह ॥

मन्त्रसिद्धि बिहारसं उत्पन्न जुम्ह कुलिशरत्न ।
नमस्कार नमस्कार श्री आर्यतारायात ॥